



Las serias da mesiraziuns unicas dals glatschers dal Grischun pon vegnir consultadas da nov sin ina charta interactiva en l'Internet. Nossa foto mussa il glatscher da Calderas en Val Bever.

FOTO UFFIZI PER GUAUD DAL GRISCHUN

Midadas tar ils glatschers en il Grischun

Pussaivladad da consultar chartas en l'Internet

■ (cc) Dapi passa 100 onns mesira il Servetsch forestal dal chantun Grischun las posiziuns da las lieungas da differents glatschers. Questas serias da mesiraziuns unicas pon vegnir consultadas da nov sin ina charta interactiva en l'Internet. Glatschers fascineschan – ed els èn fitg impurtants tant dal puntg da vista scientific sco er economic. Fluctuaziuns tar glatschers valan sco in dals megliers indizis per identifitgar midadas dal clima. Ils glatschers èn reservuars d'aua e giogan sco tals ina rolla impurtanta per il diever economic (aua da baiver, producziun d'electricidad) e per la valitaziun

dal privel d'aua gronda. Ultra da quai han ils munds glazials impressiuants er per il turissem ina muntada che na dastga betg vegnir sutvalitada.

Las collavuraturas ed ils collavuratur da l'uffizi da guaud e privels da la natira (UGP) mesiran mintga onn las lieungas da differents glatschers sin il territori grischun. Grazia a questas mesiraziuns existan per passa 20 glatschers en il chantun Grischun serias da mesiraziuns che cumpiglian per part bler dapli che 100 onns. Quests resultats unics vegnan integrads en la perscrutaziun actuala davart ils glatschers e davart il clima e servan tranter

auter a verifitgar models u ad analizar signals climatics. Els vegnan dentant er duvrads per giuditgar las consequenzas directas ed indirectas che las midadas tar il glatschers han per l'ambient.

Ils glatschers ch'èn vegnids mesirads en il Grischun vegnan presentads da nov en ina charta interactiva. Tar mintga glatscher mesirà pon ins ultra da quai consultar ina pitschna documentaziun cun maletgs istorics ed actuals.

Link a la charta interactiva:
<http://map.geo.gr.ch/gletscher> (duvrar il buttun «i» en la trav da simbols per survegnir infurraziuns davart ils glatschers).